

Nana Cominí Uri Illafue

Naga nairai Naciones Unidas railla rafuemo danomo duide. Perú iemo duide. Naga nairaimona damie jaide. Rafuena siadollena, danomo oficabidimaci. 10 de diciembre de 1948 bie rabemo ita rafuena llotimaci. Nana ie rafuena nana cominí uiñollena jitaiddimaci. Ie jira Perú ie gobierno bie rafuena birui cuetatate.

Nano llogafue

Biena uiño: Nana cominí jiaie cominí anamo iñellena, ie finua diese nagamie feiñollena, nana cominí uri illena, bie rafuena lloticaí. Comena nagamie jeicia jira, bie rafuena lloticaí. Nana cominimo bie rafue daje isoi duide.

Biena uiño: Ailluena cominí, diga icaño jiaie cominimona duere sefuilla jira, nana cominí jaciruiñeno iacana jira, naga cominí rana iacana jira, bie rafuena lloticaí. Duere sefui raillano, nana cominí nie isoide rafuena jaciruiñeno llollena, bie rafuena lloticaí. Duere sefui raillano, nana cominí nie isoide rafuena jaciruiñeno llollena, bie rafuena lloticaí.

Biena uiño: Naga gobierno ie cominina canua, naimacimo bie isoide rafue illena. Gobierno diga, jobaime naimaci finoñellena, bie isoide rafue ie cominimo illena, naga gobierno ie cominina canua.

Biena uiño: Naga nairai jiaie nairai diga, nabairillana caijitailla jira, bie rafuena lloticaí.

Biena uiño: Naga Naciones Unidamo duide nairai bie rafuedo jaiacana jira, bie rafuena lloticaí. Nagamie comena jeiciga. Iima riño baifemo fañede. Riño iima baifemo fañede. Cominí duere itinona jitañedicaí, iadedi naimaci uri caimare illana jitaiddicaí.

Biena uiño: -Danomo bie rafue llocana jaiticaí - nana Naciones Unidamo duide nairai llotimaci.

Biena uiño: Bie rafuena nana cominí raise atona uiñuana jitaiddicaí. Iena nana cominí uiñuamona, bie rafue suicana jaite.

Danomo ofillanona bie rafuena lloticaí

Nana cominí bie rafue anamo jitaiddicaí. Naga nairai bie rafuena iuana jitaiddicaí. Bie rafuena naimaci cominina llofuiana jitaiddicaí. Naga nairai bie rafue lloga uai finuana jitaiddicaí, nana naimaci cominí bie rafuena ollena. Ie jira bie rafuena lloticaí.

Rafue 1.

Nana cai comuillamona dama cai abido iticaí. Cai comuillamona jiaimie anamo iñedicaí. Nana daje facaiconi iticaí. Abi uiñuana comuidicaí. Dani coninirie cai nabairilla.

Rafue 2.

Nana cominimo bie rafue duide. Naga nairaimo bie rafue duide: naga riñomo, naga iimamo, Jusiñamuina sedadimie, Jusiñamuina sedañedimie, jamai bue isoidimie, jamai bue isoiñedimie, dueredimie, ucuberedimie, riai uaina ñaitimie, jiaie uaina ñaitimie, diese itinomo bie rafue duide. Nie isoide gobierno anamo naimaci ia, bie rafue nana naimacimo duide.

Rafue 3.

Nana cominí illana jitaiddicaí. Jiaie cominí anamo bu jacaiñenia, jiaime anamo budi naimie anamo oreñena. Nana cominí jiaie cominina jaciruiñenana jitaiddicaí.

Rafue 4.

Jiaie comemo maijillena jaca budi cominina ebe isoi fecañena. Iena caidica.

Rafue 5.

Cominina isi cacaitañena. Duere sefuiñellena, cominina janafefitañena.

Rafue 6.

Naga gobierno railla: -Nana cai eniruemo itinodi cominidimaci. Ie jira daje isoi nagamiaiina canoiticaí -railla.

Rafue 7.

Nana cominí gobierno lloga uai anamo daje isoi itimaci. Nana cominimo gobierno lloga uai daje isoi duide. Bie rafuedo jaiñedimiemona jaca buna duere sefuiñena.

Rafue 8.

Gobierno lloga uaido jaiñedimiemona bu duere sefui, naiena raise siadollena, juez dine naimie jaillana buna rairuiñena.

Rafue 9.

Ilaiacominidi jamai ebena buna gaitañena. Calabozomo, cárcelmo jamai ebena buna uiñega. Ie nairai motomona budi jamai ebena dotañega.

Rafue 10.

Bumo llogidua rafue ia, naie rafue duiñena juez dine naimiena uille, naie rafue raise siadollena. Bainino iene finoñena.

Rafue 11.

Bumo llogidua rafue ia, naie rafuena nia siadoñenia, naimiena nia duere finoñena. Juez dine naie rafuena bainino siadoñena. Naimie dibeimo itinona naimiena riidollena rairuiñena.

Navui ie finoca nia rairuiñega rafue facaina birui naimiena duere finoñena. Rairuica rafue bu finoa, ie finoca facaise duere sefuillacino baifemo naimie duere sefuiñena.

Rafue 12.

Nagamie jofomo uri illa. Ie illa cominí diga icirafuena finoñena. Bu naimiena uri itatañenia, naimie jitaia, ie uri itatañedimiena naimie llogidoia, iena illaiacominí rairuiñena. Bu naimie jeare ñaia, naimie jitaia, naimie jeare ñaitimiena naimie llogidoia, iena illaiacominí rairuiñena.

Rafue 13.

Ie nairaimo nine bu macariacania, illaiacominí naimiena rairuiñena. Ie nairaimo nine ie jofo illana bu jitaia, illaiacominí naimiena rairuiñena.

Jiaie nairaimo bu macariacania, illaiacominí naimiena rairuiñena. Abido ie nairaimo naimie biacania, illaiacominí naimiena rairuiñena. Ilaiacominí naimiena caidiñena.

Rafue 14.

Duere sefuillamona jiaie nairaimo nainomo duere sefuiñellena bu jaiacania, illaiacominí naimiena rairuiñena.

Maraiñedicino finoñenia, naimie jaillana illaiacominidi rairuiñena.

Rafue 15.

Naga gobierno railla: -Nana cai eniruemo itinodi cai comini. Cai nairaimo duudimaci -railla.

Gobierno ie cominina oni dotañena, jiaie gobierno naimacina feiñoiacaiñenia. Cai nairaimo duiñedio -illaicomini buna iese lloñena. Jiaie nairai imiēna bu jaiacania, illaicomini iēna rairuiñena.

Rafue 16.

Ie aina illena, nie eimie riñona oiacania, iēna buna rairuiñena. Nie isoide riñona ollena buna rairuiñena. Ie ini illena, nie riño eiñaiño imana oiacania, iēna buna rairuiñena. Nie isoide imana ollena buna rairuiñena. Ua mei, uruiaina iaimaia comuitajana buna rairuiñena.

Aina ollena, inina ollena, conimana jitaillanona iite.

Naga ima ie ai diga ia, naga riño ie ini diga ia, ie nairai judaisiñeite, iadedi naga ima ie aiñede riño diga icabia, ie nairaidi judairite. Naimaci comini uri illena, naimaci nairaiai judaisiñellena, naga gobierno ie cominina canua.

Rafue 17.

Eniruenta bu namataacania, jofona bu namataacania, rana bu namataacania, illaicomini naimiēna rairuiñena. Naga come iēna namataacania, jiaie comini diga iēna namataacania, illaicomini naimiēna rairuiñena.

Bumona ie eniruenta, bumona ie jofona, bumona ie rana jamai ebena bairoñena.

Rafue 18.

Bue isoide ramo ie comecina facaia, buna naimiēna rairuiñena. Jusiñamuina bu sedaacania, buna naimiēna rairuiñena. Nie isoidimiēna bu sedaacania, buna naimiēna rairuiñena. Jiaie raivedo bu jaiacania, buna naimie rairuiñena. Jiaie cominimo naimie inuacino lluauna buna rairuiñena. Ie joioimo iēna lloia, jino iēna lloia, naimiēna buna rairuiñena.

Rafue 19.

Nie isoide ramo ie comeci facaia, naimiēna buna rairuiñena. Naimie comeci facajacino muidona, naimie duere sefuiñena. Jiaie nairaïmona bue isoide comecina facajacinona naimie feiñoiacania, jiaie nairaïmo bue isoide comeci facajacinona naimie oretaiacania, iēna illaicomini rairuiñena.

Rafue 20.

Jamai nie isoide rafue finollena comini ofitaia, naimacina buna rairuiñena. Nie isoide rafuemo bu duicania, iēna buna rairuiñena.

Nie isoide rafuemo bu duiacaiñenia. Iemo naimie duiñena buna rairuiñena.

Rafue 21.

Naimie jitaia, danomo ofillano, nagamie ie illaicomini nie isoi ie nairai sedajacinodi siadoga. Naimie atona siadoiacaiñenia, naimie facaina jiaimiedi iēna siadolle. Ie illaicomini rafuena bu siadoiacania, naimiēna buna rairuiñena.

Illaicominina bu jaiacania, iēna buna rairuiñena.

Comini jitailla dieše illaicominidi nana cominina sedaja. Dajerie illaicominina jaillena, comini dinena naimacina fetua. Nana comini uainino naimacina fetua. Naie illaicomini meidollirui jiai lloga.

Rafue 22.

Seguro social railla rafuemo nana comini jainaiaina. Naie rafuemona ie gobierno ucube illa dieše nagamie feiñua. Naimie buena jitai raillano, naimie comena jira, naimie uri illena, iese nagamie feiñua.

Rafue 23.

Nie isoide rana bu maijiacania, naimiēna buna rairuiñena. Mare ra illanomo naimie maijia.

Maijille jaca illena, gobierno canua.

Jiaimie iemaijamona ibana feiñoia, naimie isoi bu maijia, ie maijamona ibana raise feiñua.

Naimie comena jira, ie comini buena jitai raillano, ibana naimie raise feiñua. Raise feiñoñenia, gobierno naimiēna canua.

Rafue 24.

Maijia fuilla mei, bu jafuier oiacania, naimiēna buna rairuiñena: Cominina are maijitañena, iadedi naimci maijiacana dinori maijia. Fiesta raillaruimo naimaci maijitañena, iadedi nairui facaina ibaca.

Rafue 25.

Ie comini buena jitai raillano, ie maijimonagagamie ibana feiñua. Ie comini raise guillena, iniroi illena, jofo raise illena, remedio ollena, ie dieše ibana feiñua. Bu maijinia, bu duia, bu feciñoia ia, bu uacimana jiaia, ie ucube bumo iñenia, gobierno naimiēna canua.

Riño jocua facaise gobierno naiñaiñoia canua. Gobierno naga uriaina daje isoi canua. Moorede uruena canua. Naiso moto oga urue daje isoi canua.

Rafue 26.

Nana uruiat escuelamo jaillana buna rairuiñena. Nano jailla años facaina ibatañena. Escuelamo nana uruiatjailla. Primaria fuillanona jinie escuelamo bu jaiacania, iēna illaicomini t rairuiñena. Rabena uiñotino dieše nainomo feiñoga.

Escuelamo naga rafuena raise finuana profesor llofuega. Naga urue comena jira, iese llofuega.

Nana conina nabairillana llofuega.

Rafue 27.

Nie isoide rafue ie nairai fñoia, nagamie nainomo jaillana illaicomini rairuiñena. Naie rafue ite ie comeci jaisillena jira, iēna rairuiñena.

Nie isoide rana bu cueia, naiemona dama naimie ibana feiñuana buna rairuiñena.

Rafue 28.

Bie rabemo cuega rafue suillena buna rairuiñena. Nana comini bie isoide suille rafue illanomo jainaiaina.

Rafue 29.

Dani coniniri ie illanomo nagamie dajena maijia, nagamie comena jira.

Ie gobierno lloga uai dieše nagamie ie jitaillacinona finua. Jiaie cominino ie comecina facajano iēna finua. Nana comini uri illana iēna finua.

Uri illena Naciones Unidas lloga uaina buna jeare uacaiñena.

Rafue 30.

Bie rafuedo jaiacadinona buna rairuiñena. Bie rafue uiñuamona, bie rabemo lloga rafuena buna jamaiñena.